

Fiainam-pirenena

2

Zaza Ramandimbiarison

3

Marefo ny fampianarana eto amintsika

Paska: enga anie hiverina ny fifampitokisan'ny samy Malagasy



RNT8 Morondava-Bekopaka

6

Tsy maintsy misokatra hoy ireo mpisera-dia

www.gvalosoa.com

gvalosoa@yahoo.com

facebook : gazety valosoa rakoto

Alakamisy 6 aprily 2023

Laharana 1422

Vidiny : 600 Ar

Filoha Ravalomanana

2

Miombom-po amin'ny mpanao gazetin'ny La Gazette de la Grande Ile



Resaky ny SEG sy Rajoelina

2

Ilay jeneraly Serge Gellé mihitsy no toa fôpla



Ministra Tokely Justin

2

Nahazo teha-maina tamin'ny fianakaviambe iraisam-pirenena



Jirama

7

Manamafy ny fikarohana ireo tale jeneraly teo aloha ny Bianco



Halatra basin'ny fonjan'i Vavatenina

6

Mpiandry fonja 3 sy voafonja 3 nidoboka am-ponja

Fetin'ny Paska

7

Fihenam-bidy miavaka ao amin'ny Baolai

Daka kely



Efa mahamenatra amin'ny

Vozongo mihitsy ny ataon'ialahy sy ny akaman'ialahy ry Boaikely a !

FILOHA RAVALOMANANA

Miombom-po amin'ny mpanao gazetin'ny La Gazette de la Grande Ile

Nandritra ny fihaonana fifampiarahabana tratry ny taonan'ny Tiako i Madagasikara, na ny TIM Manjakandriana ny alatsinainy teo tany Sambaina, nasian'ny filoha Marc Ravalomanana teny ny momba ny resaka fahalalahan'ny asa fanaovan-gazety eto amintsika. Miombom-po amin'ny mpanao gazetin'ny La Gazette de la Grande Ile aho, hoy ny filoha Ravalomanana. Tsy rariny ny fanakatonana ity gazety ity, sy ny karazan'ny fandrohana ny fitaovany nataon'ny mpitantandro filaminana hoy ny filoha nasionalin'ny antoko TIM, sady filohan'ny rodoben'ny mpanohitra RMDM. Manohana ny hetsika ataon'ny federasionan'ny fikambanan'ny mpanao gazety : FAJAM koa izy, mitaky ny hanokafana indray ity gazety ity, satria raha tsy misy ifandraisany amin'ny asa fanaovan-gazety ny raharaha Lola Rasoamaharo, tokony tsy ho norobaina ny fitaovana nampiasan'ny mpanao gazety sy ity gazety ity. Noho ity raharaha ity misy ambadika politika, mpanao gazety maro no lasa tsy an'asa, ka azo ekena izany hoy ny filoha Marc Ravalomanana, fanitsakitsahana ny



Ny filoha Marc Ravalomanana.

fahalalahan'ny asa fanaovan-gazety, sy fanitsakitsahana ny zon'olombelona ihany koa, amin'ny tsy nijerena ny zon'ireo mpanao gazety.

Isambilo

Ministra Tokely Justin

Nahazo teha-maina tamin'ny fianakaviambe iraisam-pirenena

Mahakasika ilay tsy fahazoana mamory olona ankalamanjana navoakan'ny ministry ny atitany : Tokely Justin, azo lazaina fa felaka teha-maina no nomen'ny fianakaviambe iraisam-pirenena azy, satria tsy manaja ny lalana iraisam-pirenena izany, tsy manaja ny zon'olombelona, eny tsy manaja ny lalampanorenana misy koa. Namoaka fanambarana iraisana ny Vondrona iraisam-pirenena, manoloana ny fanapahankevity ny gouverneanta, izay mandrara ny famoriam-bahoaka ankalamanjana, araka ny nitondran'ny ministry ny atitany, Tokely Justin, azy ny zoma 31 martsa lasa teo ireny. Naneho ny ahiahiny ireo masoivoho vahiny avy



amin'ny firenena manankatao monina sy miasa eto amintsika, izay nanao sonia ity fanambarana ity, sao hitarika korontana eto Madagasikara, amin'izao ankatoky ny fanomanana ny fifidianana ho avy, ity fanapahan-kevitra noraisin'ny governemanta, tamin'alalan'ny ministeran'

ny atitany ity. Anisan'ireo nanisy ny sonia ny Delegasionan'ny Vondrona Eoropeanina eto Madagasikara sy ny Union of Comores; ny Masoivohon'i Alemaina eto Antananarivo; ny Masoivoho Frantsay eto Madagasikara, ny Masoivohon'i Japon eto Madagas-

car; ny masoivoho Britanika (UK in Madagasikar); ny Masoivohon'i Suisse eto Madagasikara; ny Biraon'ny masoivohon'ny Fanjakan'i Norvezy eto Madagasikara; ary ny Masoivohon'i Etazonia. Manantena sy miandrandra ny fifidianana madio, mangarahara, marina, eken'ny rehetra ao anaty fitoniana ny Vondrona iraisam-pirenena, arak'io fanambarana iombonana nataon'izy ireo io. Mahakasika ity raharaha ity, efa tezitra sy nanakiana mafy ity ministry ny atitany ity, sy ny governemanta koa, ny filoha nasionalin'ny rodoben'ny mpanohitra RMDM, sady filoha nasionalin'ny antoko TIM, Marc Ravalomanana.

Niaina

Fiainam-pirenena

Marefo ny fampianarana eto amintsika

Amin'izao fotoam-pialantasatry ny Paska izao, dia mba nanatona mpianatra sy ray amandrenin'ny mpianatra vitsivitsy ny gazety, nanontany azy ireo hoe: mba nanao ahoana ny fampianarana vita izay raha oharina amin'izay toe-draharaha sy tranga na ny lalana nodiavin'ny firenena izay? Tsorina fa na ny ankizy amin'ny CeG, Lycée, sy ambaratonga ambony dia samy nilaza fa "MANTA MOHAKA", "TSIZARIZARY", MAREFO ny fampianarana eto. Tsy ampny ny tanjona tokony ho tratrarina, be ireo taranja tsy tontosa aradalana noho ny olana vokatry ny andro ratsy, ny fahasahiranana ara-bola, ny tsy fahaiza-manao eo amin'ireo mpanabe, izay efa tsiny nanenjehana ny



Fram sasantsasany hatrany raha vao niandoha ny taom-pianarana. Ny eny amin'ny Anjerimanontolo, dia ity vola fanampiana ny mpianatra tsy mety mivoaka ity, no efa sakana ho azy ireo, ka mahatonga ny fianarana ho tsizarizary sy efa tojo fitokonana sy fihetsiketsehana samihafa foana. Ny

ankizy madinika ihany koa dia nolazain'ireo ray Aman-dreniny, fa tsy araka satria nisondro-bidy avokoa ny fitaovam-pianarana, ka lasa kitoatoa daholo ny anjaran'izy ireny, tsy afaka manao fianarana manokana "cours" ohatra, satria mbola mila tambiny avokoa izay atao, tsy ampny ny ho enti-ma-

nana ka dia mihemotra tsikelikely eny, mety miala tsy fidiny amin'ny sekoly mihitsy aza. Tsorina anefa fa na ireo efa vita fianarana, be diplaoma aza izao, dia mitaraina fa tapi-dalaleha ihany koa, nilaza izy ireo fa vita ny fianarana nefa na ny asa atao aza tsy misy, ny orinasa rahateo dia manda azy ireny, satria tsy mifanaraka amin'ny fari-pahaizany ny anjara karama tian-komena azy ireny na izay tambin-karama kely eo. Hita fa mitombo tsikelikely ireo be atidoha kely karama, izay toa lasa jiolahy rehefa tsy mahita ho hani-na, mpanolana, mpangarom-paosy, mpandroba manara-penitra mihitsy aza atsy ho atsy.

Beharo

Ny Valosoa sy fakafaka

Resaky ny SEG sy ny Filoha Rajoelina Ilay jeneraly Serge Gellé mihitsy no toa fôpla

Anisan'ny mahatohina ny tena mpino kristiana marina ny fahenoana, na ny fahitana olona milaza ny tenany ho kristiana, nefa ny fihetsika sy ny zavatra ataony miàla amin'ny sori-dalana voafaritr' izany. Ratsy no aterak'izany, satria sady manohintohina ny olona sasany izany, no mety hampihemotra ihany koa ny hafa tsy hiroso resy lahatra amin'ny finoana kristiana. Anaty herinandro masina rahateo isika ary indrindra alakamisy masina izay andro lehibe ho an'ny kristiana izany, ka fotoana mety izao ilazana izany fihetsik'olona mamohitra izany. Tsy entin-kentim-poana ny anarana maha kristiana, ary tsy isaloran'izay te hisalotra rehetra izao kanefa karazany manombo fanindroany an'i Kristy izany toetra ratsy izany, na ihany koa karazany ambodia mitafy hodi-janak'ondry. Miàla tsiny amin'ny teny mitsara ihany, fa efa tsy fotoana intsony izao hifamitahana na hamitaham-bahoaka. Ilay vahoaka malagasy efa fadiranovana mafy ary mena-mitaha amin'ny firenen-kafa ilay Madagasikara, noho ny fampahantrana lalina nandritry ny fotoana maharitra. Miha- mibaribary hatrany ny fampanjakana ny tsy rariny sy tsy hitsiny eto amin'ny firenena amin'izao fotoana izao. Ny fitondrana mihitsy no tena manao izany, ary voamarina ny tenin'ny profesora James Ratsima fony fahavelony izay nanitrikitrika ny amin'izany. Niaraha-naheno sy nahalala tsara ny fanambarana miaro hafetsen-dratsy izay vakiana fotosiny araka ny fitenenana ankehitriny. Mody nampidirina ihany koa ny antoko manohana ny fitondrana, mba tsy hibaribary sy mora aelin'ny akoho tokan'anaka ny nambara. Miharihary, fa manao kajikajy politika mafy ny olon'ny fitondrana ankehitriny iarovany-tseza, ary fanta-bahoaka ihany koa ny tahotra misy aminy hiatrika izao fifidianana izao. Efa be ny olom-pirenena sy antoko nilaza izany. Ny resaka eny anivon'ny fiaraha-monina, hatrany anaty fiara fitateram-bahoaka ihany koa mirona amin' izany. Ka inona intsony no mbola afenimpenina ? Andrasana fatratra indray ny ho vokatry ny fanadihadiana momba ilay rakipeo namoaka tsiambaratelon'ny fitondrana iny, resaka teo amin'ny filoha Rajoelina, sy ny sekreteram-panjakana amin'ny zandarimariam-pirenena (SEG) Serge Gellé izay nolazaina fa afaka herinandro eo raha ela dia ho fantatra sy ambaran'ny fitondrana ny vokatry ny fanadihadiana. Raha halalinina ity raharaha ity dia ny SEG mihitsy no fôpla araka ny fitenin-jatovo, inona no nakany, na ny nanaovany "enregistrement" ny resany tamin'ny filoha, naninona koa no mbola naporitany tao amin'ny vondrona Whatsapp ny zandary izany, fa tsy baiko no tonga dia nomeny ireo zandariny rehefa avy niresaka tamin'ny filoha izy. Midika fa tsy mahatana tsiambaratelo ity manamboninahitr ambony jeneraly ity, ka ho hita eo ny fanapahan-kevity ny filoha sy ny fitondrana momba azy. Ity raharaha ity angamba no ho voalohany amin'ny fanadihadiana natao, mba hisy tohiny sy fiarafarany. Ho hita eo...

Sôh'son

PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue. Remerciements au Sacré Cœur pour faveurs obtenues.

Hanta R.

Ny Valosoa sy hadihady

Fitondrana Rajoelina

Tsy tambo isaina ny fanitsahana lalampanorenana ataony

Tsy fantatra intsony na tsy fahaizana mitantana na tahotra diso tafahoatra, na fampiharana mi-vilana ny lalàna velona no itantanan'izao fitondrana Rajoelina Andry izao ny Firenena noho ny resaka politika. Ny tena mibaribary dia ny tsy fanajana ny Lalàmpanorenana teo amin'ny fanendrena governora isam-paritra kanefa fifidianan'ny mpifidy vaventy no mifidy ny Lehiben'ny Faritra sy ireo Mpanolontsaim-paritra. Nanambara ny Fitsarana Avo momba ny Lalàmpanorenana (HCC), fa « vonjy maika » (provisoire) ihany izany kanefa dia efa ho tapitra ny fe-poana itondran'ireo nampindramina ny fahefana ireo, fa mijanona eo amin'ny toerany ireo governora. Torak' izany koa ny any amin'ireo Kaominina tsy mbola misy Ben'ny Tanàna sy mpanolotsain'ny tanàna miisa roaplo mahery. Efa mahazatra ny filohan'ny Repoblika Rajoelina ny mibodo fahefana, ka mampitatra izany araka izay tiany toy ny tamin'ny tetezamita. Tsy azo odiana tsy hita ny fifampifangaroana ny fahefana, ka ny fahefana mpanatanteraka indray no mibaiko ny fahefana mpitsara sy ny fahefana mpanao lalàna. Ny tranga tato ho ato misongadina dia ny raharaha Ra-soamaharo Lôla izay niandoha tamin'ny resaka voalaza, fa fitakiana vola tsy ara-drariny izay nosokajian'ny mpitory azy ho raharaha sivily kanefa namoronana vesatra hafa indray dia ny tsy fandoavany faktorian'ny Jirama mitentina efajato tapitrisa ariary ny taona 2016. Tsy fantatry ny niketrika ny vesatra, angamba, fa misy ny « prescription quadriennale » izay mamaritra, fa rehefa tsy nihetsika tao anatin'ny efa taona izay mahatsiaro ho tsy nisitraka ny zony ara-bola dia foana ho azy izany. Midika izany fa ireo manampahefana ankehitriny tokoa, no mitondra ka afaka manao izay tiany atao. Tsy lazaina intsony ny fanaovan'ny olom-boatendry tsinontsinona ny olom-boafidy, ka "préfet de police" no manakana, amin'ny alàlan'ny herim-pamoretana, ny solombavambahoaka tsy hanao tatitra amin'ireo vahoaka nifidy azy. Fandikan-dalàna tsotra izao ny fanakanana ny olompirenena na mpanao politika na olon-tsotra na fikambanana tsy haneho hevitra izay midika ho fanitsakitsahana ny demokrasia sy fizorana any amin'ny didy jadona. Niaraha-naheno ny vaovao tany Toamasina, fa ny "préfet de police" no mampiantona didim-pitsarana satria olom-boatendry izy, ka tsy fahefany na zony ny ma-

nome baiko ny fitsarana. Satria ny mpitondra ankehitriny no nanendry azy dia mihevitra izy fa azony atao ny manao izay tiany atao, ka tsy maintsy milefitra amin'izay fanapaha-keviny ny sehatra rehetra ao anatin'ny tanàna ananany fahefana. Mihevitra ihany koa ity manam-pahefana ity fa ao anatin'ny antokon'ny mpitondra izy, ka afaka mampiasa izany loko politika izany na dia amin'ny maha mpiasam-panjakana azy aza. Midika izany fa ireo manam-pahefana isan'ambaratongany eo amin'ny sehatry ny asam-panjakana dia mihevitra, fa rehefa manohana ny fitondrana izy dia afaka mitsabaka amin'ny raharaha ny amin'ny sehatra tsy azony idirana. Efa mahazatra ny fandikan'ny herim-pamoretana ny lalàna momba ny "franchise universitaire" ka idirany amin-kery any anatin'ny faritry ny Anjerimanontolo ary isamborany mpianatra mitaky ny zony tsy nositrahany nandritra ny volana maro. Mitaky ny fanaovana fanadihadiana momba ny fitifirana vahoaka tany Ikongo ny solombavambahoaka voafidy tany an-toerana. Araka ny kabary nataon'ity solombavambahoaka ity dia tena manelin gelina ny mpitondra izy, ka nisy fivorian'ny tandapa teto an-drenivohitra, ny sabotsy lasa teo, ka nisongadina tamin'izany ny tetika hoentina manao velampandrika hamonoana azy ho faty. Tsy misy miafina amin'ny olompirenena mpanaraka ny fiainam-pirenena, indrindra eo amin'ny sehatra politika, fa manampatra fahefana sy tsy mitsahatra ny manitsakitsaka ny lalàna velona eto amin'ny Firenena izao fitondrana izao. Hiatrika fifidianana ny Malagasy amin'ity taona ity, ka mba hahalany izay kandida mendrika sy tiana ho tonga eo amin'ny fitondrana dia ireo lalàna tsara indrindra dia ny fandrafetana ny Lalàm-pifidianana hanampinana ireo hirika rehetra hangalarana, hanamarinana ny lisitry ny mpifidy sy hame-trahana mpikambana ao amin'ny Fitsarana Avo momba ny Lalàmpanorenana sy ny Vaomieram-pirenena Mahaleotena Miandraikitra ny Fifidianana, ho avy amin'ny hery velona rehetra misy eto amin'ny Firenena. Adidy tsy maintsy tanterahin'ny Raiamandreny ara-panahy sy ireo Olobe ny mandresy lahatra ny mpifidy tsy an-kanavaka, hahay hanavaka ny vary sy ny tsiparifary, ka tsy ho voavidy amin'ny zavatra mandalo sy manodoka fa hibanjina lavitra.

Andry Tsiavalona

Andriandrainarivo Josephin Tokony hifampierana amin'ny rehetra ny hankalazana ny taom-baovao Malagasy

Tsy maintsy teny ifampierana avy amin'ny solontenan'ny foko rehetra eto Madagasikara no tanterahina, mba hahatonga ny fankalazana ny taom-baovao Malagasy iraisan'ny rehetra, hoy Andriamatoa Andriandrainarivo Josephin filoha nasionalin'ny Antm : fikam-banan'ny mpitsabonentim-paharazana eto Madagasikara. Nanohy fanazavana ity filoha nasionalin'ny vovonan'ny mpitsabonentim-paharazana eto Madagasikara ity, fa efa nisy rakitra ara-tantara momban'ny taom-baovao Malagasy ny 1908-1909 tao amin'ny Akademia Malagasy, izay namafy fa isaky ny volana Bitaka (Septambra) na lohataona no misokatra ny taom-baovao Malagasy ary efa nanatanteraka fivoriana tetsy amin'ny « Arrupe » Faravohitra ny Zanadranavalona Anosimanjaka, notronin'ny solontena avy amin'ny faritra nandinika miaraka ny fomba hanatanterahana ny fanamarihana an'io taom-baovao Malagasy io. Nanamafy Andriamatoa Josephin, fa nosan-tarina teto Imerina ny hetsika fankalazana ny taom-baovao Malagasy ny tsinam-bolana Septambra 2017, ka ny tanànan' Antsirabe sy i Betafo ary i Ambohimanga no nandray izany. Nanohy fanazavana ny filohan'ny Antm, fa i Fianarantsoa no nampiantrano ny hetsika fanamarihana ny taona 2018, ny faritanin'i Toamasina ny taona 2019, taorian'ny fihibohana 2020 dia tanànan'i Mahajanga no nampiantrano ny fankalazana ny taom-baovao ny taona 2021, ny faritanin'Antsirananana ny taona 2022 ary ny faritanin'i Toliara no hanaovana ny fanamarihana amin'ny tsinam-bolana Septambra 2023 ho avy izao. Manoloana ny resaka maro mandeha amin'izao fotoana izao dia nilaza Andriamatoa Josephin, fa tsy fankalazana ny taom-baovao Malagasy ny fetin'ny Santabary (Volana Martsa) sy ny Alahamadibe (20 Aprily-23 Aprily), fa taom-baovao ho an'ny foko Merina ary tsy maintsy ifampierana amin'ny be sy ny maro ny fametrahana ny taom-baovao Malagasy, mba hisian'ny firaisankinan'ny mpiray tanindrazana.



Ny filohan'ny ANTM.

Franck Razakambelo

ZAZA RAMANDIMBIARISON

Paska: enga anie hiverina ny fifampitokisan'ny samy Malagasy

Mitondra fanehoan-kevitra momba ny raharaham-pirenena indray ny mpa-nao politika, Praiministra lefitra teo aloha, Zaza Ramandimbiarison amin'izao Herinandro Masin'ny Pas-ka izao:

"Enga anie hiverina ny fifampitokisana ny samy Malagasy ary ny "Paska", hanome fanomezana lehibe ho antsika rehetra dia ny "Fanantena vaovao". Mandihy fotoana sarotra i Madagasikara. Mahantra tanteraka ny Malagasy maro an'isa. Miaina ao anatin'ny fifandraisana iraisam-pirenena tena mifamatotra isika ankehitriny. Moa ve tsy tokony hanararaotra ny fiovanjavatra izay miseho eo anivon'izao tontolo izao, mba hametravana fiaraha-miasa vaovao sy fototra vaovao hananganana Madagasikara "manara-penitra"; ny Malagasy rehetra

dia manantena fahasambarana ao anatin'ny filaminana. Fotoana izao hanombohana ny fanovana amin'ny fomba tsara ny fari-piainan'ny Malagasy. Ny ankamaroan'ny Malagasy dia miandrindra ny fiverenan'ny fihavanana matotra indray, sy hampanjaka ny firahalohana tanteraka. Ary izany dia tokony hatomboka amin'ny teny ifampierana amin'izao fotoana fikarakarana ny fifidianana izao, ka hanamafy orina ny fifampitokisana indray. Ny eritretrity ny maro momba ny "Madagasikara rahampitso" dia Madagasikara mamaly ny filàn'ny ankamaroan'ny Malagasy, ny ilaina ankehitriny sy ho avy amin'ny alalan'ny fandrosoana ara-toekarena sy ny fiovana ara-tsosialy; Madagasikara mampihatra fomba fitantanana sy fiasa madio sy mangarahara. Manana fotodrafi-

trasa maharitra sy manara-penitra; "Madagasikara rahampitso" ho an'ny maro dia ho fiaraha-moina azo antoka, mponina nianatra sady salama tsara ary mampihatra foana ny fihavanana sy ny fahamarinana. "Madagasikara rahampitso" dia mandroso ara-toekarena sy manana vola matanjaka. Tsy hanomboka izany vina izany, raha toa ka tsy manomboka amin'ny fanatanterahana ny fifidianana filoham-pirenena madio sy mangarahara manaraka ny dingana sy fepetra nodinihana, sy nifanakalozana ary nankatoavin'ny samy Malagasy tamin'ny alalan'ny fifampiresahana an-kalalahana sy an-kitsirano tsy misy tetika maloto ao ambadika. Raha mandeha tsara izany teny ifampieranana izany dia hiorina indray amin'izay ny fifampitokisana eo amin'ny samy

Malagasy ary ho velona indray ny fanantenana ny amin'ny ho avy. Io fifampitokisana io, izay tena ilaintsika tokoa noho izao toe-javatra misavorovoro misy eo tanindrazana izao, no fototry ny fahombiazan'ny hetsika rehetra ataontsika amin'ny ho avy, ho fanatsarana mahomby ny fiadanana ny Malagasy rehetra. Samia mivavaka fa masina ity tanindrazana iombonana malalantsika ity! Ary enga anie ho tanteraka ny voalaza ny hiram-pirenentsika hoe: "Tahionao ry Zanahary Ty Nosindrazanay ity, Hia-dana sy ho finaritry, He sambatra tokoa izahay", ary ny fifalian'ny rehetra amin'izao fotoana hatsiarovana ny fitsanganan'i Jesosy Kristy amin'ny maty izao hitondra fanantenana, hery ary fahasambarana ho an'ny rehetra."

Nangonin'Isambilo

TONTOKALO

Ny mpitondra ankehitriny sy ny fampianarana

Tena tsy ampiasany saina ny tontolom-pampianarana, Fa ataony faralahiny amin'ny zavatra rehetra. Izany hoe grevy izany, nofinofy izay hifarana, Vahaolana mba hainy : fitaka sy herisetra !

Mpianatra efa lany vatsy sy tsy manan-trano akory, No indreny fa mijoro sy mitaky izay mba zony. Nefa tokana ny baiko : izay mihetsika sambory. (Donto ve ireo mpitondra, tsisy fo mitempo intsony ?)

Nefa anie tsy volabe ity ilay vatsy fanome, Fa tena kely sady zara raha hoe mahatody volana. Saingy toa vao mainka koa alentiky ny debabe, Ka dia mitohy mitohy hatrany sady tsy mivaha ny olana !

Fampiesonana no betsaka, laingalainga tsy mijanona: "Efa ao anie ny vola fa sonia no sisa andrasana!" Kanjo inona no eo fa toa tsy misy zava-banona. (Asa angamba, mbola vola hotadiavina any am-pasana!)

Ny mpitondra filaminana, efa be manaonao foana: Tovovavy no aboridany, anehoany ny habibiany ! Baiko avy amin'iza ireny, ireo lehibeny ve no moana, No dia tsy ahitana teny , sa izay no fifaliany ?

...Fa dia tsy ampiasana saina ny tontolom-pampianarana. Izay hoe drafi-panarenana dia tsy hita sy tsy tazana. K'aza gaga raha tsy misy izay mba sombim-pivoarana, Noho ireo donto mianakavy tsy ahitana fahombiazana!

IRINA HO TAFITA (25-03-23)

An-tsary misongadina Ny Valosoa Vaovao

Helisoa, Navalona

Nanentana ireo olompirenena hisoratra anarana ao anaty lisipifidianana ny TIM Boriboritany faha-2, ka ny fokontany Miandrarivo, Volosarika, Faliarivo Ambanidia, no nandehanan'izy ireo tamin'izany.



Depiote TIM, Feno RALAMBOMANANA, vita ny fanamboarana "dalot d'evacuation" ao amin'ny Fokontany Antaninandro Ampandrana, tafiditra ao anatin'ny volan'ny CIAD 2021 ao amin'ny Boriboritany fahatelo Antananarivo Renivohitra.



NY TENY FIAINANA


"Fifandirana ihany no vokatry ny fiavonavonana; fa ao amin'ny mino anatra no misy fahendrena."

Ohabolana 13:10

MPANAO GAZETY LIVAMALALA A.

Nilofika teo amin'ny faha-34 taonany

Misaona ny tontolon'ny asa fanaovan-gazety Malagasy, fa nilofika tamin'ny alatsinainy 03 aprily 2023 teo, teo amin'ny faha-34 taonany, ny namana mpanao gazety mpikarakira vaovao ara-panatanjahan-tena ary mpikambana feno ao amin'ny ao amin'ny UJSM "Union des Journalistes Sportifs de Madagascar", sy niasa nandritra ny 12 taona katroka tao amin'ny fahitalavitra Viva, Andriamananjara Livamalala na Liva. Aretina AVC no nahazo tampoka azy tamin'ny antoandron'io andro alatsinainy io, rehefa avy nisakafo teny Alarobia, fa avy nanodina fandaharana Top Chrono



Andriamananjara Livamalala fony fahavelony.

nandeha tamin'ny 6 ora hariva tamin'io andro io ihany ny tenany. Tsotra sy be vazivavy i Liva fony fahavelony, raha ny nifaneraserana tamin'ny ary amin'ny maha mpikarakira vao

ara-panatanjahan-tena azy dia saika nifanena nivantana tamin'ny foana teny an-kianja samihafa teo Andrenivohitra izahay, rehefa nitrandraka ifotony ny vaovaoom-panatanja-

hantena ary indraindray aza niaraka hatrany amin'ny Faritra ivelan'Antananarivo mihitsy. Namela mananontena sy zanaka vavy kely iray Itompokalahy amin'izao nandaozany ny tany izao, ka eny Mahazoarivo no hiandrahana ny nofo mangatsiaka ary rahampitso zoma 06 aprily 2023 no hasitrika eny Anjanaharry. Iza-hay eto amin'ny Gazety Ny Valosoa Vaovao dia mirary fiononana feno ho an'ny ankohonany sy ny fianakaviany manontolo ary ny fianakaviany mpanao gazety amin'ny ankapobeny mihitsy. Veloma ary mandria am-piadanana Liva!

Rainilita

Ny Club Cosfa Football

Ekipa faharoa tafita amin'ny «Playoffs Orange Pro-League 2022-2023»

Ny Cosfa Football ao amin'ny vondrona "Conférence Nord" manana isa 23, no ekipa faharoa tafita hiatrika ny dingana "Playoffs", amin'ny fifaninana baolina kitra "Orange Pro-League 2022-2023". Amin'ny alahady ho avy izao dia hikatroka amin'ny ekipan'ny Tffc Mahajanga etsy amin'ny kianja syntetika Mahitsy ity ekipan'ny Miaramila ity amin'ny andro faha-13. Fandaharan-dalao andro faha-13 samy hanomboka amin'ny 2 ora 30 avokoa. Vondrona "Conférence Nord" sabotsy 08 aprily 2023 : Cosfa # Tffc (kianja sentetika Mahitsy), Alahady 09 aprily 2023 : Uscafoot # Ajesaia (kianja monisipaly Alarobia), Asa Diana # Fosa Junior Fc (kianja



Ny ekipan'ny Cosfa Football 2023.

monisipaly Antsiranana), Tia Kitra Fc # As Fanalamanga (kianja "Barikadimy Stadium Toamasina"). Vondrona "Conférence Sud" Asabotsy 08 aprily 2023 : Cffa # 3Fb

Toliara (kianja "Elgeco Plus Stadium By-Pass), Elgeco Plus # Dato Fc (kianja "Elgeco Plus Stadium By-Pass), Alahady 09 aprily 2023 : Zanakala Fc # Disciples (kianja

"Stade Morderne Ampasambazaha Fianarantsoa), Jet Kintana # Mama Fc (kianja sentetika Mahitsy).

Rainilita

Mialohan'ny basikety N1A Lahy sy Vavy

Nifarana omaly alarobia 05 aprily 2023 ny fifindrana klioba

Nampahatsiahy an'ireo mpilalao basikety Malagasy naniry ny hifindra klioba, mialohan'ny fanombohan'ny fifaninana nasionaly N1A lahy sy vavy 2023 hatao any Antsirabe ny FMBB « Federation Malagasy de Basket Ball », fa nifarana omaly alarobia 5 aprily 2023 ny fanatanterahana an'izany FIFINDRANA KLIOBA izany, ho an'ireo mpilalao rehetra tsy ankanavaka anatin'ireo sokajy ireo araka ny voafaritry ny lalàna nohavozina tamin'ny taona 2017 « aliéna 3 », izay manam-



Fihaonana basikety N1A lehilahy Malagasy.

bara fa tsy maintsy vita 10 andro mialohan'ny fanom-

bohan'ny fifaninana hatrehana ny fifindrana

klioba. Rainilita

Sakafo Ny Valosoa



Akoho sy holatra saosy indray, no laoka amin'ny Sakafo eto amin'ny gazetinao androany. Dia mazotoa homana tompoko.

NY VALOSOA sy Mahaso

Ny mahatsara ny menaka avy amin'ny coco

Ny mahatsara ny menaka avy amin'ny coco, na voanio indray, no Mahaso eto amin'ny gazetinao androany. Ny huile de Coco, na menaka avy amin'ny coco dia menaka tsara atao amin'ny sakafo andrahoina. Hanina amin'izao raha misy cholesterol sy triglyceride ambony, tsara ho an'ny olona manana olana ao amin'ny saina koa izy.



NY VALOSOA sy Mahaliana

Ny tanànan'Ambahoabe distrikan'i Soanierana Ivongo faritra Analanjirofo

Tao aorian'ireo tanàna tamin'ny kaominina miisa 12 tany amin'ny distrikan'i Maroantsetra, ireo tanàna amin'ny kaominina miisa 8 any amin'ny distrikan'i Soanierana Ivongo, faritra Analanjirofo ihany, no Mahaliana eto amin'ny gazetinao.

Ny tanànan'Ambahoabe distrikan'i Soanierana Ivongo faritra Analanjirofo indray, no Mahaliana eto amin'ny gazetinao androany. Renivohitra ny kaominina Ambahoabe ity tanàna ity, iray amin'ireo kaominina miisa 8 mandrafitra ny distrikan'i Soanierana Ivongo. Mbola tsy tena avo toerana izy, satria 123 m ny haavony miohatra amin'ny ranomasina. Any afovoany atsimon'ny faritra Analanjirofo no misy azy. Vokatra any ny jirofo, ny vary, ny voankazo toy ny letchi, ny akondro, ny manga, ny haninkotrana toy ny mangahazo, ny vomanga.



HALATRA BASIN'NY FONJAN'I VAVATENINA

Mpiandry fonja 3 sy voafonja 3 nidoboka am-ponja

Raharaha halatra basin'ny fonja tao Vavatenina faritra Analanjirofo, mpiandry fonja 3 sy voafonja 3 nidoboka am-ponja. Nahitam-bokany ny famotorana natahon'ny Zandarimaria matahakasika fahaverezana fitaovam-piadiana ; basy 4 sy bala maro, tao amin'ny fonjan'i Vavatenina ny harivan'ny 28 mar-

tsa 2023 lasa teo. Mpan-draharahan'ny fonja 3 sy olona efa mifonja 3 koa no naiditra am-ponja von-jimaika, raha arahi-maso ara-pitsarana kosa ilay lehiben'ny fonja sy ny Le-finy. Tazonina amin'ny fonja ivelan'i Vavatenina no amonjana azy ireo, raha ny fantatra.

Niaina



Ireo basy sy bala sarona.

Chorale Orimbato Ambatonakanga

"Hery iray": amboarankira Paska ao anatin'ny faha-50 taonany

Ao anatin'ny Jobily Volamenan'ny Chorale ORIM-BATO ao amin'ny FJKM Tranovato Ambatonakanga, no anolorany Amboarankira miavaka, ho fankalazana ny PASKA 2023. Nomeny ny lohateny hoe HERY IRAY ity fampisehoana ity ary nankinina amin'ny Soratra Masina araka ny 2 Korintiana 12 : 9b manao hoe : « fa ny heriko dia tanterahina amin'ny fahalemena ». Hisy fizaram-potoana roa ka ny voalohany dia handresanana ireo hira Paska voafantana, izay noforonina ho an'ny Antoko Mpihira toy ny hoe Maty Jesosy (R. Harkness), Rano-maso (Hiary Rapanoelina AVM), Tafatsiangana tokoa (Andriamiandamahatratra)... Ny Tapam-potoana faharoa dia hanandra-tan'ny Orimbato ireo hira notsongaina avy tamin'ny



Ny Chorale Orimbato ao amin'ny FJKM Tranovato Ambatonakanga.

fihiranam-piangonana samihafa, natokana hizarana ny merin'ny fitiavan'Andriamanitra izay mitondra fampihavanana sy fiainana, satria resy ny fahafatesana, isan'izany ny Lazao lay tantaran'ny

Vonjy (Fihirana Advantista), Misaotra Anao Jesoa Hôstia (Fihirana Katolika), Mamy ny fitiana (Fihirana Anglikana), ary hira nalaina tamin'ny fihirana Protestanta FFPM toy ny He manda fiarovana (FLM)

RNT8 Morondava-Bekopaka

Tsy maintsy misokatra hoy ireo mpisera-dia

Ny alatsinainy faha 27 Martsa lasa teo, no nanomboka ny asa fanamboaran-dalana izay nataon'ireo mpisera-dia ao amin'ny Tsingin'i Bemaraha any Bekopaka. Izaon natao hoy izy ireo dia satria efa ho avy ny fotoana izay fiavian'ireo vahiny mpizahatany hitsidika ny tsingin'i Bemaraha, ka noho ny fahasimbana misy amin'izany lalana izany dia nanapa-kevitra ireo mpisera-dia ao Bekopaka, efa hanao tanamaro hanadio sy fanamboatra io lalana io, satria mandeha ny fotoana, ny fanjakana toa tsy taitra. Isan'ny nanampy nahafahana nanao izany tanamaro izany Andriamatoa Daniil Abdullah, (DG) tale jeneralin'ny Groupe Kimony Lodges & Resort, izay nanome vola 2 tapitrisa Ariary amin'ny fanatanterahana izany asa izany, teo ihany koa ny Assistant Administratif Bekopaka sy CB Bekopaka, izay nanampy amin'ny fitandroana ny filaminana nandritra ny asa, sy fanomezan-tanana amin'ny fanatanterahana ny asa. Fanombohana ihany izao ataon'ny Guides sy Piroguier, ary ny Délégue sy CB Bekopaka izao, fa mbola hitohy amin'ny asa tanamaro izay hanatanana ireo vahoaka maro izany. Nahita izany ny minisitry ny fizahantany, Joel Randriaman-

dranto dia tonga nitsidika ny faritra Menabe ny faha 02 sy 03 Aprily 2023, ka ny faha 02 ny Aprily izy no nigadona tao amin'ny Distrikan'i Miandrivazo ary namory ireo tomonandraiki-panjakana, sy ireo mpisehatra amin'ny fizahantany ao Miandrivazo tao amin'ny Hotel EDEN de Tsiribihina ao Masiakampy, nandinihana ny fandriampahalemana amin'ny ranon'i Tsiribihina, izay isan'ny mahasarika mpizahatany maro tokoa. Nitohy tany amn'ny ny kaominina ambanivohitra Tsimafana distrikan'i Belo sur Tsiribihina izany ny faha 03 Aprily tapany maraina ; izay nihaonany tamin'ny OMC, sy ireo mpisera-dia ary mpandraharaha eo amin'ny lafiny fizahantany ato amin'ny distrikan'i Belo hatrany Bekopaka, ka nandray azy niaraka tamin'ireo solontenan-panjakana ny ben'ny Tanàna lefitra, satria ny ben'ny Tanàna mbola tsy eto an-toerana noho ny fahoriana izay nihàtra tamin'ny. Ny mikasika ny fiomanana amin'ny fandraisana ireo mpizahatany amin'ity taona ity, no lahadinika, ka noresahina manokana ny fitandroana ny filaminana amin'ny fitaterana amin'ny ranon'i Tsiribihy iny, indrindra fa ny miala ao Begidro hatrany Bekopaka. Nisy ny paikady nape-

traka, saingy mijanona tsiambarelato eo amin'ny mpitandro filaminana izany. Nasian-teny tao ihany koa ny mikasika ny lalana RNT8, izay tsy maintsy hasiana fijerena haingana hoy ny Minisitra, ka vola iray tapitrisa no natolony ho an'ireo mpisera-dia ao Bekopaka, mba hanohezana ny asa-tanamaro ary nampian' Andriamatoa Daniil Abdullah, DG ny Groupe Kimony Lodges & Resort iray tapitrisa Ariary izany vola izany ary mbola nanome 400.000 Ariary ho an'ny fokon-tany Andimaka koa ity tale jeneraly ity, mba hahafahana manao asa-tanamaro. Tao aorian'izany, nitsidika ny Hotel Relais du Kirindy ny minisitry sy ireo mpiara-dia tamin'ny nandritra ny fihazozana an'i Morondava, satria nandeha fiara nandroso sy niverina tamin'ny RNT8 mampitohy an'i Belo/Tsiribihina sy Morondava iny izy ireo. Ny harivan'ny 03 Aprily dia nisy ny lahadinika manokana tao Morondava izay notarihan'ny minisitry niarahana tamin'ireo tomonandraikitra eo anivon'ny faritra Menabe, izay nandinihana sy nijerena vaholana ny lalana RNT8 mampitohy an'i Morondava hatrany Bekopaka, nivoitra tao anatin'izany fa efa andalam-pandinihana ny lalana, ny solontenan'ny asa vaventy ao Morondava ary efa

sy Tamin'ny andro voalohany (FJKM). Fomba iray hanehoan'ny Orimbato, fa iray ny fianakavian'ny Mpino Kristiana. Araka izany dia fotoana iray hanehoana fampiraisana ity Amboarankira PASKA hatolotry ny Orimbato ity, ka hanasany am-pitiavana ny rehetra hiara -hidera an'Andriamanitra noho ny Heriny namonjery antsika olombelona. Hira efitra ambiny folo no mandrafitra ity seho ity, izay tarihin'i Fabrice Razafimanjony ; ary eo amin'ny zava-maneno kosa no ahitana an'i Tsiresy Rajaonarifetra. Ao amin'ny FJKM Tranovato Ambatonakanga no hanatanterahana izany, amin'ny Alahady 9 Aprily izao manomboka amin'ny telo ora sy sasany tolakandro, ary tsy misy vidim-pidirana.

Aly

Kolontsaina sy fetin'ny Paka Jazz Festival hatao any amin'ny Nosy Sainte-Marie

Kolontsaina sy fetin'ny Paka, hisy ny Jazz Festival hatao any amin'ny Nosy Sainte-Marie faritra Analanjirofo. Ho an'ireo mpanakafy ny mozika jazz rehetra, na ho an'ireo te hitsangatsangana fot-siny dia hisy ny hetsika: Nosy Boraha Jazz Festival, hatao any Sainte Marie. Mpikarakara ny hetsika ny NBJF, mpanohana ny Minisiteran'ny fizahantany, izao hetsika ara-kolontsaina izao dia efa nanomboka omaly 5 aprily, ka tsy hifarana raha tsy amin'ny 10 aprily. Sady miala voly no mitsangatsangana no mankafy mozika ny any an-toerana.

Antony iray nisafidianana an'i Sainte Marie manokana ho an'ity andiany ity dia ny maha nosy manankarena amin'ny sehatry ny fizahantany azy, ary izao hetsika izao dia natao indrindra hampiroboana ny fizahantany sy ny kolontsaina, hisarihana mpitsidika maro ho avy eto Madagasikara.

Maro ireo mpanakanto malagasy handray anjara amin'izy ity, ao ireo mpiangaly jazz sangany eto Madagasikara toa an'i Samy Andriamanoro, Lalatiana, ao ihany koa i Denise, Weaver Trio, Yri-naf, sns... Fa mampiavaka azy ity ihany koa dia ny nanafarana mpanao jazz anisan'ny malaza avy any Etazonia dia i Sulaiman Hakim. Maro ireo fialamboly hatao amin'izany, tahaka ny feu de camp, animations gospel, ny "Jazz Train" miainga ao amin'ny gare Andasibe, sns... Hisy ihany koa ny hetsika ara-tsosialy hatao toy ny fizarana boky hanampiana ny sekoly any an-toerana.

Aly



Mpikarakara sy mpandray anjara, amin'ny Nosy Boraha Jazz Festival.

Mpanakanto « Guste »

« Hanitsiako ny mpiara-belona ny Rap »

Soanandrasana Augustinna no tena anaran'ity tovolahy mpanao Rap gasy efa ho 08 taona izao ity. Guste no anarana nofinidiny isalorany anatin'ny habaky ny mozika Rap. Efa nahavokatra rakikira miisa 02 ahitana ny "Nahoana ary ?" sy ny "Rap Literatiora". Anisan'ny sanganasan'i Guste efa maro mpanakafy sy mpiondana ilay vazony "Mediocratie". Hira manambara amin'ny fomba mahitsy toraka, fa maro ireo endrika tsy fahatomombanana sy tsy fahampiana eo amin'ny fomba fitantanana an'i Madagasikara tahaka ny fisian'ny kolikoly, ny fahantrana miompampiana, ny trafika maloto amin'ny endriny maro, sns...).

Fitaovana iray mahomby ampitako ny fomba fijeriko ny fiainan'ny firenena (politika, sosialy, toekarena, sns...) sy ny fampahafantarana ireo lesoka mila ahitsy sy madilana mila tentenina eo amin'ny fiainam-piaraha-monina amin'ny ankapobeny, araka izany, ny mozika Rap, hoy i Guste. Mora kokoa ny mampita ny hafatra anatin'ny zavakanto tahaka ny mozika ho an'ireo mpiara-belona, hoy hatrany izy. Maro ireo olana sedraina anatin'ny fanaovana mozika, hoy i Guste nefa tsy natao sakana ireny noho ny fitiavana mivaivay ny taranja mozika. Ny fizarana miandalana hiza ny sehatra maha matihanina no tanjona ho an'ity mpanakanto ity. Misokatra malalaka ho amin'ny fiaraha-miasa sy fifanomezan-tanana ho fampiroboroboana ny Rap gasy i Guste. Marihana fa nandalina ny lafiny fitantanam-bola "Finance" i Soanandrasana Augustinna ary manana ny mari-pahaizana "Maitrise". Manohy hatrany ny diany ny tovolahy !

Lalaso Razafindrakoto



I Guste, 08 taona niangaliana ny Rap gasy.

Rajepa



Delegation de l'Union européenne auprès de la République de Madagascar et de l'Union des Comores



British Embassy Antananarivo



Ambassade de la République fédérale d'Allemagne Antananarivo



AMBASSADE DE FRANCE À MADAGASCAR

Liberté
Égalité
Fraternité



Schweizerische Eidgenossenschaft
Confédération suisse
Confederazione Svizzera
Confederaziun svizra

Ambassade de Suisse pour Madagascar, les Comores et les Seychelles



AMBASSADE DU JAPON A MADAGASCAR



Ambassade de Norvège

Bureau de l'Ambassade Royale de Norvège à Antananarivo

FANAMBARANA

Maneho ny ahiahiny mahakasika ilay fanambarana nataon'Andriamatoa Tokely Justin, ministry ny Atitany sy Fitsinjaram-pahefana tamin'ny 31 Marsa teo, izay mametra ny hetsika politika na famoriam-bahoaka atao anaty toerana mifefy, ataon'ny hery hafa ankoatran'ny mpitondra fanjakana, ireo masoivoho vahiny izay manao sonia etsy ambany.

Iray amin'ireo fototra iorenan'ny demokrasia ny fahafahana maneho hevitra an-kalalahana, izay voarakitra ao anatin'ny lalàm-panorenan'i Madagasikara tamin'ny 2010.

Nankatoavin'i Madagasikara ny Fifanarahana iraisampirenena momba ireo zo sivily sy politika tamin'ny taona 1971. Ny andininy faha-21 amin'io fifanarahana io dia mametraka ny fanekena sy fanamoràna ny zo hivory am-pilaminana hampiroborobona ny zo sivily sy politika amin'ny ankapobeny.

Na dia marina aza fa ilaina ny fitandroana ny filaminana dia tokony ho voalanjalanja ny fandrindrana azy ary tsy asiana fanavakavahana, araka ny rafitra momba ny zon'olombelona ao amin'ny Firenena Mikambana.

Ny fenitra iraisam-pirenena mahakasika ny zon'olombelona dia tsy manisny fanavahana manokana na mialoha na mandritran'ny fifidianana, fa tokony mety foana rehefa mifanaraka amin'ny tombontsoan'ny olona sy ireo fikambanan'ireo antoko politika, mba hiantohana ny fampandehanana araka ny tokony ho izy ny demokrasia.

Maneho ny ahiahiny ireo masoivoho noho izany, amin'izay mety ho fiantraikan'io fanapahan-kevitra noraisina io. Mety hampihenjana ny rivo-politika eto Madagasikara io amin'izao ankatoky ny fifidianana izao, kanefa tokony hisy aza ny fifampitokisana eo amin'ny mpandray anjara rehetra, araka izay novoizina nandritra ny fivoriana nokarakarain'ny CENI tamin'ny 24 martsa lasa teo. Ny fanantenan'ireo masoivoho, amin'ny maha namana sy mpiara-miombon'antoka amin'i Madagasikara dia ny hahita fifidianana mangarahara, azo antoka, malalaka, ary milamina amin'ity taona ity.

Ny manao sonia :

- Delegasion'ny Vondrona Eoropeana
- Masoivoho Alemana
- Masoivoho Amerikana
- Masoivoho Frantsay
- Masoivoho Japoney
- Masoivoho Britanika
- Masoivoho Soisa
- Biraon'ny Masoivoho Norveziana